

Боқий сатрлар

Хусайн Бойқаро
ЖАМОЛИНГДИН
КЎЗУМ РАВШАН

حسین بایقرا
جمالینگدین کوزوم روشن

باقی سطرلار

❧ Боқий сатрлар ❧



Хусайн Бойқаро

**ЖАМОЛИНГДИН
КЎЗУМ РАВШАН**

Ғазаллар



Нашрга тайёрловчи ва сўзбоши муаллифи
Суйима Ғани қизи

Тошкент

Ғафур Ғулом номидаги Нашриёт-матбаа бирлашмаси

1991

Девони Султон Хусайн Мирзо Бойкаро,

Кобул, 1346 йил хижрий

© **Хусайн Бойкаро, Девон. Рисола.**

Ғафур Ғулом номидаги Бадий адабиёт нашриёти, Тошкент, 1968 йил

Бойкаро, Хусайн.

Жамолингдин кўзум равшан: Ғазаллар/Нашрга тайёрловчи ва сўзбоши муаллифи Суйима Ғани қизи.— Т.: Ғафур Ғулом номидаги Нашриёт-матбаа бирлашмаси, 1991.—32 б.

Шарқнинг жуда кўп шоҳлари салтанатни бошқариш қаторида бадий ижод, илм-фан билан ҳам жиддий шугулланишган. Ҳазрат Алишер Навоийнинг замондоши, дўсти Хусайн Бойкаро ана шундай шоҳлардандир.

Хусайний таҳаллуси билан ғоят гўзал ғазаллар битган бу салтанат соҳибининг ижодига Навоий юксак баҳо берган.

Ушбу китобга Хусайн Бойкаронинг энг сара ғазаллари жамланди.

Байкара, Хусайн. Радует глаза твоя красота: Газели.

Б 4702620102—136
М 352(04)—91 Доп 91

Ўз 1
© Суйима Ғани қизи, 1991 й.

ISBN 5-635-01107-1

ҲУСАИНИЙ

Ҳусайн бинни Бойқаро бинни Умаршайх бинни Темур 1438 йилда Ҳиротда дунёга келган. 1469-1506 йилларда Хуросон ҳукмрони бўлган. У Алишер Навоийнинг мактабдош дўсти, ўзбек адабиётида маълум из қолдирган лирик шоирдир.

Ҳусайн Бойқаро даврида салтанат пойтахти Ҳирот бутун Шарқда илм, санъат ва адабиётнинг яшнаган марказига айланди.

Заҳириддин Муҳаммад Бобурнинг ёзишича, «Султон Ҳусайн Мирзонинг замони ажаб замоне эди, аҳли фазл ва беназир элдин Хуросон, батахсис Ҳирот шаҳри мамлу эди. Ҳар кишинингким бир ишга машғуллуғи бор эрди, ҳиммати ва ғарази ул эрдиким, ул ишни камолга етгургай».

Ҳусайн Бойқаронинг турк адабиёти ва тили соҳасидаги фаолияти диққатга сазовордир. У турк тилида ижод қилишни ғоят олқишлаган, ҳатто маълум асарларга татаббулар қилиш учун фармойишлар бериб турган. Ҳусайн Бойқаро ҳузурида, унинг бевосита иштирокидаги «Олий мажлис»ларда асарлар, шеърят намуналари муҳокама қилинар, адабий мавзуларда қизғин суҳбатлар ўтказилар эди. Бундай қайноқ Ҳирот адабий мактабида Ҳусайн Бойқаронинг бадий истеъдоди чархлана борган ва соҳиби девон шоир сифатида шуҳрат қозонган. Шу боис унинг ижодида кўплаб татаббулар учрайди.

Алишер Навоий ўзининг «Муҳокамат ул-луғатайн» асарида Ҳусайн Бойқаро туркигўй лақаби билан машҳур бўлган «рамали мусаммани мақсур» вазнининг ғоят раволиғ ва латофатидин руҳпарварлиғ ва салосатидин ўз девонларин... боштин-оёқ илтизом қилиб, бу вазнда тартиб бериб-дурлар эрди», деб ёзади.

«Мажолис ун-нафоис»да эса Алишер Навоий махсус мажлис — алоҳида бобда Ҳусайн Бойқаро шеърятини тадвин қондасига кўра алифбо тартибида таҳлил қилиб беради. Бунда шоир ғазалларидаги мавзуй ранг-баранглиги, бадийиётдаги кашфиётлар, ноёб ташбиҳлар, дилрабо адолат ҳақида атрофли сўз юритади. Шоир тараннум этган ишқнинг қудрати ва ишқнинг изтироблари, интилишлари, руҳиятига юзланган малуллик ёхуд ҳушнудликни ажиб бир дилбарлик билан тараннум этишга ноил бўлганини кўрсатиб беради.

Ҳусайний шеъриятида дунёвий руҳдаги лирика анъаналарига, Алишер Навоий лирикасига таянгани кўзга ташланади. Айни чоқда, унда ижодкорнинг шоирона шуури, бадий ўткир нигоҳи рўйи рост намоён бўлади.

Суйима Ғани қизи

Ваҳки, кўнглум ноласи ҳар дам бузулгон жон аро,
Гўйиё бир чўғз эрур, фарёд этар вайрон аро.

Хуққаи лаълинг аросинда эрурму дур тишинг,
Ё эрур ул жолаким, бўлғай гули хандон аро.

Ҳар киши кўрса парилар ичра сен кўз мардумин,
Бир парини жилва қилгон соғинур инсон аро.

Онча қон тўкти кўзум ҳажрингда, эй қон тўккучи,
Эмди кўз очсам кўрармен, оламедур қон аро.

Сел келса жола бирла ўхшатурмен ангаким,
Кўзларимнинг оқи окқан дийдаи гирён аро.

Истагач мажруҳ кўнглумдин ўкини рашкдин
Топмасун деб ёшурубмен сийнаи бирён аро.

Икки қошингнинг хаёли муттасил кўнглумдадур.
Бир диловардекки, солмиш икки ё қурбон аро.

Ҳажр ғирдобида ғарқ ўлдум, каманди васл ила,
Чек мениким, қолмайин бу баҳри бепоён аро.

Келди ишқимға илож этмакка, бир кун бир рафик,
Эй Ҳусайний, куйди ушбу шуълаи сўзон аро.

Ўтға ёндур сарвни, ул қадди раъно бўлмаса,
Елга бергил гулни, ул рухсори зебо бўлмаса.

Сарв бирла гул тамошосиға майлим йўқтурур,
Боғ аро ул сарви гулрухдин тамошо бўлмаса.

Нега сафлар чекти мужгондин, агар жон мулкига
Кўзларининг майли ҳар дам қатлу яғмо бўлмаса.

Бўлмағай эрди жунун даштида саргардонлиғим,
Зулфи печу тобидин бошимда савдо бўлмаса.

Гавхари мақсуд топмоқ мумкин эрмас, эй рафиқ,
Кўз ёшинг то васл умиди бирла дарё бўлмаса.

Сокиё, май тутки, ҳажр андуҳидин бўлмон халос,
Ҳар дам илғимда лаболаб жоми саҳбо бўлмаса.

Эй Хусайний, бода ичсам ёр алидин тенг дурур,
Бўлса оби Хизру умри жовидон ё бўлмаса.

* * *

Бўлди гул вактию мен хор ғамидин мубтало,
Ҳажр ўкидин лоладек бағримда юз доғи бало.

Кон ёшимни кўрдингу гулдек кўнгул холин дағи,
Бу сифат холимни пас оллида арз эт, эй сабо.

Гаркамен кўз мардумидек кон ёшим селобиға,
Оҳким, фарёдима етмас бу кун бир ошино.

Холи зорин сен киби султондин айру тушкали,
Ефроғ эрмас, гулғаким юз тил била айлар адо.

Мен билур эрдимки, йўктур интихо ишқимга ҳеч,
То гули васлинг била қилдим муҳаббат ибтидо.

Лоладек май жомини тутғил ғанимат гул чоғи,
Ҳосаким ишратқа урди булбули бедил сало.

Гар Хусайний топмади барге жамолинг боғидин,
Бу чаманда, эй гули наврас, санга бўлсин бако.

* * *

Не ажойиб хўй эрур, эй шўҳи сийминбар санга —
Ким, неча меҳрингга жон берсам, эмас бовар санга.

Е санга йўқ раҳм, ё пайғомим айтурда сабо
Қилмади зоҳир менинг холимни, эй дилбар, санга.

Чунки девонангмен, олғум йўк, этокингдин илик,
Гар жафо юз мунча бўлса, эй парипайкар, санга.

Хоҳ жавру зулм кил, хоҳ вафоким, ҳар нафас
Волаву девонарокдур жони ғампарвар санга.

Хаддин ўткарма Хусайнийга жафову раҳм кил,
Ким улус шоҳидурур, лекин эрур чокар санга.

Фуркатингдин йўк эди жисмимда жон, жонимда тоб,
Кўзда хуноб эрдию ғамгин кўнгулда печу тоб.

Не даме дарду ғамингдин бор эди орому сабр,
Не замоне доғи ҳажрингдин бор эрди хўрду хоб.

Ногаҳон етти саводи номанг ул жон муждаси,
Ул сифатким, сафҳан кофурий узра, мушки ноб.

Ўқуғач мазмунини жонсиз танимга берди рух,
Ўйлаким, Исо дамидин ояти уммул-китоб.

Будур уммиди Хусайнийнингки, етгай васлига,
Ҳақ насиб этгай ани, валлоху аълам, биссавоб.

* * *

Телбараб итган кўнгулни истадим ҳар ён бориб,
Кўху дарёву биёбонларни бир-бир ахториб.

Топтим эрса ўлтурубтур юз ғаму андуҳ ила,
Ёр зулфидин батаррак рўзгорин тўнгториб.

Ваҳки, сўрғач ҳолини тинмай тўкуб деди сиришк,
Етти гардундин фиғону ўтлур оҳин ўтқориб.

Вомиқу Фарҳоду Мажнун меҳнатимга тўзмайин,
Куйдилар оҳим ўтидин ҳар бири бир ён бориб.

Мен дағи тўзмай анинг истаб ватан деб куймакин,
Юз туман таклиф ила келтурдим они ёлбориб.

Келтуруб чок айлабон кўксумни солдим ўрнига,
Фуркату куймак ўтидин борисидин кутқориб.

Эй Хусайний, ул келиб тутгач висоли журъасин,
Тиндуруб кўнглумни мен ҳам ичтим они сипқориб.

* * *

Бир мусофир ой хаёли килди кўнглумни хароб,
Қолмади жонимға онсиз бир замон тоқат, не тоб.

Бир арожиф сўз эшитгач ул мусофирдин бу кун,
Борди кўнглум ўтруву жонимға тушти изтироб.

Васлида кўз гоҳ йиғлар, гоҳ боқар рухсориға,
Гоҳ ёғиб, гоҳ турғондек баҳор ўлғач саҳоб.

Васли иқболида кўп озурдамен ағёрдин,
Вах, не толеъдурки, тортармен беҳишт ичра азоб.

Пардадек ул юзга юз суртарга худ йўқтур ҳадим,
Бас юзум суртарга бўлса муяссар ул никоб.

Соқиё, бир лаългун лаб шавқидин ошуфтамен,
Тут лаболаб жоми ёкутиға солиб лаъли ноб.

Эй Хусайний, ёр ҳар дам ғойиб ўлғач кеч келур,
Саҳв эмиш ул нуктаким, эл умр ишин дерлар шитоб.

* * *

Ваҳки, хижрон барқидин тушти шабистонимға ўт,
Учкуни бирла туташти байт ул-аҳзонимға ўт.

Рўзгоримниму ишқ этти қаро ё бўлди дуд,
Хажр чун ғам дўзахидин солди вайронимға ўт.

Ишқ ўтининг шуъласидин куйди кўнглум ё магар
Тушти сўзон оҳидин мажнуни урёнимға ўт.

Олам аҳли жонини куйдурди ёлғон аҳд ила,
Мунча ким берди экин ул аҳди ёлғонимға ўт.

Бода тобидин магар лаълинг бўлубтур оташин,
Ё магар май ламъаси солди менинг жонимға ўт.

Дедим: «Ўқинг тегса дардим тоғиға ўт чоқилур»,
Деди: «Сув ўрниға бермиш чарх пайконимға ўт».

Гар Хусайний оҳидин ўт тушса ҳар ён, айб эмас,
Ишқ мундоқ ҳамрах этти оху афғонимга ўт.

* * *

Тўқуб коним, тараҳҳум қилмадинг ҳеч,
Кўруб ҳолим, табассум қилмадинг ҳеч.

Табассум қилмайин жонимни олдинг,
Олиб жоним, тараҳҳум қилмадинг ҳеч.

Жаҳон аҳли куюб оҳимдин, эй ёр,
Бу оҳимдин таваҳҳум қилмадинг ҳеч.

Фироқида, кўнгул, кўп чектинг афғон,
Висолида тараннум қилмадинг ҳеч.

Хусайний, ҳажрида афғондин ўзга
Кўруб меҳнат, танаъум қилмадинг ҳеч.

* * *

Тоза бўлди боғу кўнглумда фирок озоридур,
Жилва қилди гул, нетай, бағримда ҳижрон хоридур.

Сарву гулдин ҳар дам афзун бўлса дардим, не ажаб
Дардлиғ кўнглум чу ул ҳамдари ёрим соридур.

Вах, нетай гулнор янглиғ лолалар наззорасин,
Менки, бир гулрух учун бағримда ҳижрон хоридур.

Носиҳо, гул гаштидин кўнглум иложин қилмаким,
Хаста кўнглумга тикилган хор ҳижрон коридур.

Чарх дегандур айирай гулрухунгдин гул чоғи,
Эй Хусайний, бу фирок у ваъданинг булжоридур.

* * *

Шукрлиллаҳким, жамолингдин кўзум равшандурур,
Хаста кўнглумга висолинг гулбуни маскандурур.

Ўтлуғ оҳимдинки, ҳажринг ичра чектим шуълалар,
Шамъи иқболим бу кун ул шуъладин равшандурур.

Дурфишон кўзум жамолинг жавҳарининг аксидин
Гар бурун даржи гуҳар эрди, бу кун махзандурур.

Не учун гулдек очилмай базми ишрат ичраким,
Мажлисим шамъи бу кун ул сарви сийминтандурур.

Айш ила ишрат гулин очтинг яна ишқ илгидин,
Эй Ҳусайний, санга юз таҳсину минг аҳсандурур.

* * *

Фурқатиндин хаста кўнглум қатра-қарта қон эрур,
Оллоҳ-оллоҳ, бу не ҳажри беҳаду поён эрур.

Ҳар сари юз захм эрур жисмимда, ваҳ, носих тили.
Ҳажр ўқидин ҳар жароҳат ичра бир пайкон эрур.

Кўз қилур бу важҳдин тунлар дур ашкин нисор —
Ким, хаёлинг жон уйида ҳар кеча меҳмон эрур.

Ханжари жаврингдурур ўтлуғ кўнгул осойиши,
Сув нечукким, ташна лаблар дардиға дармон эрур.

Эй Ҳусайний, ҳажр аро беҳудлуғум айб этмагай,
Ҳар кишиким, бир пари ишқида саргардон эрур.

* * *

Гунчайи хандон бориб, кўнглумда қолди хор-хор,
Тинмағур жонимға онсиз дуняда бори не бор.

Сарвқадлар, лоларухлардин очилмас бу кўнгул,
Ваҳ, нетайким, даҳр боғи ичра йўқ ул гулузор.

Васли жомидин очилур эрди кўнглум боғ-боғ,
Вой, юз минг войким, ул май бориб, қолмиш хумор.

Қайдаким кўрсанг ани, кулмак била хурсанд эдинг,
Аксин айла, эй кўнгул, ҳар ерда йиғла зор-зор.

Васл аро ҳар дам санга жоним фидо айлай дедим,
Невчун, эй оромижоним, айладинг мендин канор.

Бор дема, жон, сен ғанимат тут Музаффар васлини,
Қим, ўтубтур дуняда мундоқ балолар бешумор.

Эй Хусайний, ёрсиз сен найлагунг олам аро,
Қўп адам сарманзили азмин қилиб кейнича бор.

* * *

Ишқни манъ этсалар, шавқим ўти айлар ситез,
Шуъла янглиғким, нафас таъсири айлар они тез.

Ишқ доим заъфлик жисмимни истар ўртагай,
Оллоҳ-оллоҳ, неча қилғай барқ хас бирла ситез.

Жузв-жузвим ҳажр аро бир-бирдин айрилмоқ тилар,
Қош қилсанг ҳажр тиғидин танимни рез-рез.

Тийрадур ул турра гўёким фалак парвезани,
Хаттинг узра бўлди ҳижроним тунидин мушкбез.

Қоматинг сарви бу оламда қиёмат басдурур,
Жилва бирла пас яна ҳар лаҳза солма рустахез.

Ёрдин айру тириклик истамасмен, соқиё,
Ҳажр захридин менинг жонимға бўлғил журъарез.

Эй Хусайний, равза ишқ аҳлиға дилбар кўйидур,
Топсалар зуҳд аҳли жаннат, сен анинг кўйида кез.

* * *

Қўз қаросин ҳал қилиб ёздим санга ажзу ниёз,
Қўз ёшимни ҳам сепиб ул номаға, эй сарвиноз.

Ишқ етгач аклу хушу сабр ҳар ён бутрашур,
Ўт қаён юзланса вожибдур ул элга ихтироз.

Ошкоро жон агар лаълинг сўзин айтур, валек
Ёшурун ғунчанг била кўнглумни бордур ўзга роз,

Ул не қоматдулки, барча ростлар айлаб дуо,
Дерки, бу гулшан аро ул сарв бўлсун сарфароз.

Шавқу сабрим нақдини айлай ани кўргач фидо,
Демаса айб айлаб ул маҳваш буларни кўпу оз.

Чун ҳақиқат нури ул ораз тажаллисинадур,
Не ҳақиқат улки, онинг ишқини ўйнар мажоз.

Эй Хусайний, ёр кўйи Каъбаси Наврўз эрур,
Не ажаб гар бенаволар айлар оҳанги Хижоз.

* * *

Ул куёш кўйида мен девонани банд айлангиз,
Бори бу тазвир ила кўнглумни хурсанд айлангиз.

Кўйида мен телбани юз жавр бирла ўлтуруб,
Ул суубатларни юз девонаға панд айлангиз.

Истай-истай топсангиз кўнглумни ким бузмиш мени,
Васл тиғи бирла сиз парканд-парканд айлангиз.

Хаста кўнглум заъфи ҳаддин ўтса қувват касбиға,
Дўстлар, ул юзу лаб ёдини гулқанд айлангиз.

Кўнглокин чок этса ул маст, эйки айларсиз руфу,
Риштаи жонимни ҳар ториға пайванд айлангиз.

Кўнглума илму адаб таълими кўп бермак ила
Вомику Фарҳоду Мажнундек хирадманд айлангиз.

Гар Хусайний десангиз шўроба тўқкай талх-талх,
Хўблар, гоҳи анга боқиб шакарханд айлангиз.

* * *

Ёраб, ул гул ичра ғунча нега гуфтор айламас,
Ё билиб билмасга солиб сиррим изҳор айламас.

Тош ила фўлодға оҳим ўтидур кор гар,
Не катикдур ул кўнгулким, ҳеч анга кор айламас.

Ул жафокаш билгай аҳволим катик саъб эрканин —
Ким, бўлуб қсчлар ғами ишқин падидор айламас.

Ишқи манъида қилур носих тили кўнглумни реш,
Йўкса бу ғам ғунчасин тонг ели афгор айламас.

Тўбийи жаннат магар юз ноз ила қилса хиром,
Сарвинозим оллида ул азми рафтор айламас.

Ой юзунг таклидиға наққоши чин ҳар дам чекар
Юз рақам, лекин бирин юздин намудор айламас.

Инсу жинга гарчи йўқ ноламдин уйку, вах, не суд —
Ким, даме ноз уйкусидин они бедор айламас.

Сенки тортиб тиг эл бўғзин чекарлар ҳар тараф,
Барчаси таъжил учундур кимса зинҳор айламас.

Гар Хусайний ишкини иқрор тортар аҳли зухд,
Ахл-эмаслар йўқса ул бу ишдин инкор айламас.

* * *

Менда ҳар дам юз ниёзу анда истиғнову бас,
Ҳар замон юз жон берай, ул шўх бепарвову бас.

Демангизким, зулфи савдоси хазин кўнглунгда бор —
Ким, эрур девона кўнглумда ҳам ул савдову бас.

Ишқ торожида борди дину исломим дағи,
Демангизким, бўлмишам девонаи шайдову бас.

Не кўнгулда сабр қўйди, жоним ичра не қарор,
Йўқки ишкинг аклу хушум айлади яғмову бас.

Ерга кирсун ашкким, оқизди бағрим кон этиб,
Йўқки махфий сирри ишким айлади ифшову бас.

Килмади ушшоқ аклу дину нангу ном тарк,
Мунча расволик қабул эттим мени расвову бас.

Эй Хусайний, ишқ ила чун офият жамъ ўлмади,
Ҳар не келса урма дам кўнглунг аро асрову бас.

* * *

Ишқ сиррин ошиқ ўлғон мубталолардин билинг,
Васл комин топмай ўлган бенаволардин билинг.

Ишқу ҳажру дард қасдим килдилар гар ҳолима,
Вокиф эрмассиз, бу юзланган балолардин билинг.

Танда ҳар ўқ захмидин бағримда айланг бир бошок,
Ул бошокларнинг ҳисобин бу яролардин билинг.

Ишқ аро андуху ҳасратсиз нетар кўнглумга заъф,
Кувватин ул нотавоннинг бу ғизолардин билинг.

Эйки, билмайсиз жунунум, чун сўрарсиз ҳолатим,
Они шарҳ айларда номафҳум, адолардин билинг.

Билмаганлар ишқ бедодини Мажнун ҳолиға,
Бир жафо мен тортқан турлук балолардин билинг.

Рўзгоримнинг қаро бўлганлиғи кайфиятин,
Эйки, билмайсиз, кўзу қоши қаролардин билинг.

Жоми жамлиқ шоҳларнинг ҳашматин майхонада
Дард учун синған сафол элтур гадолардин билинг.

Гар Ҳусайний ҳолатин ишқ ичра билмайсиз, ани
Риндлиғ кўйига тушган порсолардин билинг.

* * *

Тушгали ҳажрингда, эй сарви гуландомим менинг,
Не кўзумда уйку бор, не жонда оромим менинг.

Еткурурмен шомға ҳажринг кунини юз ранж ила,
Тонгға, ваҳ, билмонки не янглиғ етар шомим менинг.

Ҳар қачон майгун лабинг хижронида чексам қадах,
Икки кўз хунобидиндур лаб-балаб жомим менинг.

Сўзи ишқимнинг сабодин, ваҳ, не навъ ирсол этай
Ким, самум ўлур сабо еткурса пайғомим менинг.

Дегасен, эй нома элтур пайк, зору хастадур,
Гар Ҳусайний ҳолидин сўрса дилоромим менинг.

* * *

Зулф очиб мен телбани ошуфта аҳвол айладинг,
Чини абрў кўргузуб кўнглумни беҳол айладинг.

Ўпкали келди кўнгул зулфунг учун, эй сарвиноз,
Сарфароз айлар маҳалда они помол айладинг.

Жон кушин сайд айламакка лаълинг узра, эй қуёш,
Донаи меҳр экинги аммо отини хол айладинг.

Ҳар қачон дедим вафо қил, айладинг юз минг ҳиял,
Эмдиким, дедим жафо қил, они филҳол айладинг.

Қатл этай деб келмадинг бошимға, эй сарви равон,
Ўзгалар қатлиға бўлдунг, муни ихмол айладинг.

Тиғи қатл урдунг кўнгулга, шукр эрур, лекин манга —
Қим вафосизлар ғамидин фориғулбол айладинг.

Гар Ҳусайний ҳажр аро деди: «Ғиғон, айлай ғиғон!»
Шукрим, васлинг била ул дам тилин лол айладинг.

* * *

Ваҳ, не ишдур, кимником мен меҳрибон қилдим хаёл,
Ўзгалардин ул мени кўпрак қилур озурдаҳол.

Кимником, андин малолат дафъини мен кўзладим,
Андин ўқ бўлди боқиб турғунча, ваҳ, хотир малол.

Оником, мен қилмадим озурда бўлғоч сўз чоғи,
Қилди ул озурда сўз бирла мени топғач мажол.

Кимником мен истадим бўлғай Масиходек фасих,
Истар улки мен дам урмай бўлғамен олида лол.

Неча мен васл истасам ул васл аро ҳижрон тилар,
Ул тилар ҳижрон неча ҳижрон ўтуб топсам висол.

Эй Ҳусайний, турфа ҳолатдур муни кимдин сўрай,
Кел яна бир қатла ҳам ул ёрдин айлай савол.

* * *

Ҳажринг ўти жисму зорим қилди кул, эй ёр, бил,
Гар бино қилсанг мазорим тархин ул кул бирла қил.

Қатл этиб овора кўнглумни бузуғ жисмим аро,
Ваҳ, билиб билмасга сол, эй жон, келиб наззора қил.

Ул каду юз ҳажридин ўлсам, безаб гулбарг ила,
Туфроғимнинг боши узра сарв эғиб, мил айлагил.

Айлагайлар саъб дардим шарҳидин изҳори ажз,
Бўлса ҳар захмим оғиз пайконинг ул оғизда тил.

Гар юзунг бўлса мудаввар, сунбулунг асру узун,
Ҳеч эрмастур ажаб, невчунким ул ойдур, бу йил.

Эй сабо, етсанг мусофир ойма зинҳорким,
Ҳажр зиндонида онсиз тийра ҳолимни дегил.

Ишк жомидин бўлубсен, эй Ҳусайний, асру маст,
Ҳусндин гар бахра топмок истасанг бир дам ойил.

* * *

Чун жунун занжирига бўлдум гирифтор, эй кўнгул,
Бўлғасен фарсуда жонимдин хабардор, эй кўнгул.

Кочсам ул занжир ила оворалиғ сахросиға,
Қилма ҳолимни хирад аҳлиға изҳор, эй кўнгул.

Қўйки давроннинг жафоойин эли бедодидин,
Бўлмайин ҳаргиз алар ичра падидор, эй кўнгул.

Анда ҳам қўймай топиб девонадур деб боғлабон,
Судраб элтур бўлсалар халқи ситамкор, эй кўнгул.

Қилсалар ғавғо улус жонимға бедод этгали,
Мендан ул дам лаҳзае айрилма зинҳор, эй кўнгул.

Шояд ул янглиғ тамошо сори маҳвашлар била,
Келгай ул шамшодкад, моҳирухсор, эй кўнгул.

Кўргач они гар Ҳусайний янглиғ этсанг тарки ҳуш,
Ҳасратида қилғасен жонимни ийсор, эй кўнгул.

* * *

Қани бир маҳваш анга сўзу гудозимни десам,
Қани бир мушфиқки, бир дам анга розимни десам.

Англағайларким ҳақиқат сирридин холи эмас,
Эл аро кайфияти ишқи мажозимни десам.

Етти чарх авроқи тўлғай етти баҳр ўлса мидод,
Бир замонлиғ ҳажр аро сўзу гудозимни десам.

Даҳр аро ошуб кўп тушгай, саломат қолғай оз,
Дарду сабрим шарҳи ичра кўпу озимни десам.

Ваҳ, нетайким, нозу истиғносин айлар бирга юз,
Ҳар нечаким, нуктаи ажзу ниёзимни десам.

Кўзки тардомандур, они не дейин арзир агар,
Кўнгул отлик сода ринди покбозимни десам.

Дўзах ўлсун масканим гар тўбийи жаннат сўзи,
Ўтса онинг ўтрусида сарвинозимни десам.

Куймаган парвона мендек, қолмағай ҳижрон туни,
Базм аро гар ламъаи шамъи тирозимни десам.

Эй Хусайний, эл саломат куйидин бўлғай жало,
Гар Навоий янглиғ оҳанги Ҳижозимни десам.

Қилган эрмиш ул пари тарки муҳаббат, билмадим,
Тушган эрмиш жовидон кўнглумга фурқат, билмадим.

Мен анга жонни фидо қилмоқтаву ул жонима,
Ҳажр ўти ёкмиш, қўярға доғи ҳасрат билмадим.

Ошиқ ўлғанда умидим бор эди нўши нишот,
Анда бор эрканни мунча нишу меҳнат билмадим.

Шуълаи шавқин ёруттум, ваҳки, маҳзун жонима,
Ҳар бир учқун бўлмоғин бир барки офат билмадим.

Васл умиди бирла ишқ осон кўрунди, войким,
Анда ҳар дам бор эканни мунча шиддат билмадим.

Мубтало бўлғанда ул кофирға қилдим тарки жон,
Бир йўли барбод ўлурни дину миллат билмадим.

Эй Хусайний, ишқни қилдим ниҳон, қилмон гумон,
Мунча расволиқ била тутмоқни шухрат билмадим.

Мен хилол ўлдум ғамингдин, сен қуёшсен, эй санам,
Йўқ ажаб гар мендин ўлса камлигу сендин карам.

Боғ аро хошок елдин ҳар тараф майл айласа,
Соясини айламас бошидин онинг сарв кам.

Чун ғаму фарёду афғони эрур гул шавқидин,
Ҳар ниҳол узра агар будбул наво тортар не ғам.

Хар каён сайр этса парвона шабистон сахнида,
Бор бу равшанким, чекар шамъ ўти кўнглидин алам.

Кўзу зулфунг бирла оғзинг сиррин элтур жон аро,
Гар Ҳусайний дарди ишқинг йўлида бўлса адам.

* * *

Оташин хилъат дема жисмим уза, эй дилбарим —
Ким, эрур ишқинг ўти бирла туташқон пайкарим.

Ё эрур сиймоби деб қилма гумонким, ишқ ўти
Ўртади мажруҳ жисмимни эрур хокистарим.

Дема ахгардек либосинг узра бор сиймоби тун,
Кулдурур сиймобисию оташиндур ахгарим.

Зийнат учун дема бор жисмингда гуногун либос,
Ишқ ўртаб сарбасар қилмиш бу зебу зеварим.

Учқай эрдим ҳар замон аз баски тенгмиш новакинг,
Бўлмаса эрди агар пайконларингдин лангарим.

Кўйида хиштики бир кун кўймишам бош остина,
Айлангиз зинҳор чун ўлсам лаҳадда бистарим.

Эй Ҳусайний, бўлмишам зуҳди риёйидин халос,
Бўлғали муғ кўйи сори дайр пири раҳбарим.

* * *

Тиг ила кўнглумни қилдинг захм, эй сийминбадан,
Қони турмайдур деб ул захм узра куйдурдинг туган.

Юз тикандек игна бирла, войким, захм айладинг,
Ҳажр аро захминг аёғига кирибтур деб тикан.

Хайф деб қайғурмағил, жоно, не асиф эмдиким,
Дарди ҳажрингдин адам сарманзилин қилдим ватан.

Эйки, ёпдинг кўнглума сабру саломат пардасин,
Пардаи сабр эрмас эрмиш улки бор эрмиш кафан.

Жонға ёр ўт ёқса марҳам ёққанича шод бўл,
Эй Ҳусайний, ишқ аро бу навъ эрур важҳи ҳасан.

* * *

Ох, агар кўрсам яна ул моҳи тобонимни мен,
Бергамен шукронаи васли учун жонимни мен.

Эй мусулмонлар, кўюнгим, сарф қилдим йўлида,
Зулфидин зуннор боғлаб, дину имонимни мен.

Эшикигда кечалар кўп йиғламоғдин оқибат,
Ошкоро айладим бу сирри пинҳонимни мен.

Деди охир бор муродимким, сени ўлтургамен,
Гар сенинг ройинг будур, қилдим бихил қонимни мен.

Неча дерсенким, Хусайний қолмади жонинг сенинг,
Эй насиҳатгў, нетай бу ёрсиз жонимни мен.

* * *

Гар келиб вайрон қабримни зиёрат қилғасен,
Раҳм этиб, эй қотилим, они иморат қилғасен.

Қатл аро таслим эрур, эй ҳажр, олингда ажал,
Неча олиб жоним изҳори маҳорат қилғасен.

Чун кўнгулда қўймадинг орому сабру ақлу дин,
Эмди, эй золим, бу кишварда не ғорат қилғасен.

Оҳим олида совуқ-солқинсен, эй дўзах ўти,
Ҳар дам ар юз қатла изҳори ҳарорат қилғасен.

Ул ой истиғносидин афлок эрур паст, эй кўнгул,
Ҳожат эрмастурки, сен арзи ҳақорат қилғасен.

Неча йил қатлиға маъмур айлабон ул ғамзани,
Ёшурун, лекин менинг сори ишорат қилғасен.

Эй Хусайний, ишқидин кечкумки, муҳлиқдур дединг,
Яхшироқ гар эмди тағйир иборат қилғасен.

* * *

Зулфи ичра хат, хат ичра лаъли хандондур нихон,
Зулмат ичра Хизр ҳам, ҳам оби ҳайвондур нихон.

Сеҳр бирла фитнадин холи эмас кўнглум даме,
Анда чун бир кўзи соҳир, холи фаттондур ниҳон.

Кўнглум ичраким, ниҳондур демангиз, эй дўстлар —
Ким, ниҳон бўлган кўнгулда кўнглум олғондур ниҳон.

Гунча оғзи нақшиму кўнглумдадур ё тан аро
Кўп хадангидинму пайкон ичра пайкондур ниҳон.

Бўлса кўнглумда сафову нур эрмастур ажаб,
Анда у юз шавкидин хуршиди раҳшондур ниҳон.

Ишқ сўзин зор жисмимда нечук пинҳон қилай,
Барқ ўти хошок аро бўлмоқ не имкондур ниҳон.

Эй Хусайний, куймагунча ишқ аро етмас висол,
Танни куйдур ошкоро, жонни ҳам ёндур ниҳон.

* * *

Ҳеч мусулмонға, нигоро, доғи ҳижрон бўлмасун —
Ким, висолингдин жудо бўлса анга жон бўлмасун.

Кўз учидин новаки жаврунг била ўлтур мени,
Домани покинг, бегим, ногаҳ яна кон бўлмасун.

Хаста кўнглум банди зулфунгдин паришондур басы,
Жамъ қилғил сунбулунгниким, паришон бўлмасун.

Жонға еттим дилбари нодон элидин, ох, ох,
Ҳеч кишининг дуняда маҳбуби нодон бўлмасун.

Жон берурда келиб ўлтур, бир даме кўрай сени —
Ким, Хусайний кўнглида, эй дўст, армон бўлмасун.

* * *

Кўнглум олур гунчаи сероби гуфтори била,
Жоним ўртар оташин лаъли шакарбори била.

Даҳр бозорида ғавғо солди Юсуф ҳусниким,
Жилвагар бўлди сенинг ҳуснунг намудори била.

Тиғи захминдин эрур хурсанд кўнглум, эй рафик,
Ёкса марҳам, кўй ўлай ул захм озори била.

Маҳвмен андоқ ул ой хусниғаким, йўқтур ишим,
Ишқининг ихфосию дардимнинг изҳори била.

Елғуз ул ой ҳажрида саргашта эрмас, менки бор,
Чарх ҳам бу ишга боис даври парқори била.

Эйки, дерсен топмадим матлубни кўп истабон,
Билки ул истарда ҳамрахдур талабқори била.

Итларига тўъма бўлғай деб Хусайний кўйди юз
Ул санам кўйига урён жисми афғори била.

* * *

Хаттининг тори тушубтур лаъли майгун устина,
Уйлаким жон риштаси бир қатраи хун устина.

Тишлари устида ҳар ким лаълини кўргач, деди:
«Барги гулдурким, тушубтур дурри макнун устина».

Холининг ҳар дам хаёли телба кўнглумда эрур,
Зоғлар андоқки ғавғо қилди Мажнун устина.

Айтғай сарв узра гул пайванд қилмиш боғбон,
Кимки кўрса оразинг ул қадди мавзун устина.

Янги ой онинг саманди наълидин келди нишон,
Ул қуёш раҳшин магар секретти гардун устина.

Майға хирқам раҳну мен махмўр, нетти майфуруш,
Ена бир паймона ҳам берсанг бу мархун устина.

Сели ашк ичра Хусайний чун кўрунмас, истаманг —
Ким, кўрунғай тушса бир хошок Жайхун устина.

* * *

Ҳажр шоми ой чиқиб, мен йиғлар эрдим дард ила,
Сайрлар қилдим сени истаб маҳи шабгард ила.

Ой уёққач ёна кўнглумни бузуб ёлғузлуғум,
Тийра шомим андуҳидин йиғладим кўп дард ила.

Чарх ҳам анжум сиришқин ҳолима кўп сочти, лек
Бўлмади йиғларда тенг мен зори ғампарвард ила.

Мотамимга чарх кўк айлаб либосин, тун каро,
Субх ҳам айлаб яқосин чок охи сард ила.

Шоми хижрондин кутулғунча иситтим меҳрдек,
Ашк селин оқизиб, титраб узори зард ила.

Дахр бўстониға кўп кўйма кўнгул, эй андалиб
Ким, анга бўйи вафо йўк юз туман, минг вард ила.

Эй Хусайний, уйқу беҳудлук, емак ғамдур менга,
То не тўлғай оқибат холим бу хобу хўрд ила.

* * *

Шоми хижронингни кўргач, келди зулфунг ёдима,
Тушти субхи васл умиди хотири ношодима.

Маст эканда демагил, сундум аёғким, ўпкасен,
Эмди сунгил усрук эрдим анда келмас ёдима.

Мақдамингдин юз хароб обод эрур, эй ганжи хусн,
Вах, не бўлғай бир етишсанг бу харобободима.

Қайда жаннат сарви бирла ҳуриға кўйғай кўнгул,
Гар малак наззора килса сарви ҳурий зодима.

Зикридур оғзимда субҳу шом, зоҳид, дема сўз,
Суди йўк, пандинг била солма футур авродима.

Ақл кайдидин халос ўлғай эди Мажнун агар
Ишк таврида кулоқ солса эди иршодима.

Эй Хусайний, хажр зулмидин неча фарёд этай,
Бу катик ҳолатда чун етмас киши фарёдима.

* * *

Нуктаи ҳолинг ажаб йўк лаъли хандон устина,
Ким бўлур бир катра доим оби хайвон устина.

Ҳажринг ўки то тикилмиш кўнглума, эй қоши ё,
Лаългун ашкимга ўхшар хори мужгон устина.

Новакингга боққи, доғи ҳасратимдиндур нишон,
Жавҳариким, кўрунур пўлоди пайкон устина.

Эй сабо, конлик кўзумга кўйидин еткур ғубор,
Расм эрур туфрок тўкмак доимо қон устина.

Ишқ тифидин бузуғ кўнглумда эрди чоклар,
Ваҳки, бўлди бир сари бу доғи хижрон устина.

Лаъли серобинг ғамидин нотавон жисмим эрур,
Мисли хошокеки, тушгай оби ҳайвон устина.

Эй Ҳусайний, ёр келса накди жон айлай нисор,
Эл сочиқ сочқан киби дилхоҳ меҳмон устина.

* * *

Хатти жонафзо чиқармиш лаъли хандон устина,
Хизрдекким, соя солгай оби ҳайвон устина.

Уйладурким, захм уза ҳар ён чибин қилгай ҳужум,
Зоғлар кўнса бу конлик жисми урён устина.

Кўз ёшим селидин ўлмас заъфлиғ жисмим, аён,
Қайда бир хас зоҳир ўлгай баҳри уммон устина.

Кулбам ичра ўртанурмен тушгай олимға куюб,
Қайси бир кушким, даме кўнса бу вайрон устина.

Бошинг узра гулму сончибдурсен, эй раъно ниҳол,
Йўқса пайванд айладинг сарви хиромон устина.

Ҳажр ўти бедодидин билгилким, оҳим дудидур,
Ҳар булутким, соя солгай аҳли даврон устина.

Итларига гар фидо бўлди сўнгадек пайкарим,
Эй Ҳусайний, ҳайрат этма, сўз борур жон устина.

* * *

Эй кўнгул, гардун балият тошини ёғдурдило,
Ҳар тараф сабрим уйи деворини синдурдило.

Қилмади ҳам тарк чун девориға берди шикаст,
Сели ғам сакфин қаро туфрокқа ҳам индурдило.

Айлар эрдим ишқнинг расволариға сарзаниш,
Бўлғали расво сўзум лоф эркани билгурдило.

Етса ҳар ғам, илму ақл авроки эрди мунисим,
Ҳар варакни бир сари оҳим ели совурдило.

Мазраъи зухд ичраким жамъ эрди сабрим хирмани,
Секриб ул хирманға бир барқи бал куйдурдило.

Офият кунжида доим бошим эрди саждада,
Ишқ охир мунча шиддат бошима келтурдило.

Эй Ҳусайний, эл эшитмас эрди тасбиҳим унин,
Ишқ афғонимни гардун токидин ошурдило.

* * *

Ишқ аро Мажнунни дерменки, ўзимга ўхшатай,
Ҳушини зойил қилиб девоналиғни ўргатай.

Субҳу васлу шоми ҳижрондек неча олам элин
Булажаб ҳолимға гоҳи кулдурай, гаҳ йиғлатай.

Жон берурмен ҳажрида, заъфимдин эл кўрмас мени,
Ишқ аро ҳар неча дерменким, ўзумни кўрсатай.

Унс тутмишмен кийиклар бирлаким, ул шаҳсувор
Овға келганда анга бу навъ ўзумни учратай.

Чун кўз очмас уйқудин бахтим не суд, эй дўстлар,
Гар фиғондин ҳар кеча олам элини уйғатай.

Кўксума тош урмоғимни айб қилма, эй рафик,
Қўйки, анда колғиған пайконларини ўрнатай.

Чун Ҳусайний кўнгли ҳар дам бир тараф оворадур,
Сўз десанг турким, жавобида кўнгулни тўхтатай.

* * *

Эй жафо тиғи, келиб мажруҳ кўксумни ёру,
Қўл яланг айлаб солиб ҳар ён ичимни ахтару.

Ахтарурда топмасанг ул кўнглумки, мажнуншевадур,
Ҳар нечук бўлса адам саҳроси сори бошқару.

Бошқарурда бормаса кўнглум адам саҳросиға,
Тўш-тўшидин санчибон ул сори они кайтару.

Кайтарурда вокиф ўлким, яна кайнаб келмасун,
Тенгри учун нотавон жонимни андин кутқару.

Кутқарурда нотавон жонимни ул бебокдин,
Юз жафо айлаб ани келтур қошимдин ўтқару.

Истабон келса яна кўксум шигофин топмағай,
Ваҳки, бир марҳам кўюб ул чоки кўксум бутқару.

Айласанг мискин Хусайний жонини ондин халос,
Дарди бу бўлғай дуода сен дағи доим бору.

* * *

Эй санга, мажнунсифат, ҳар гўшае девонае,
Оразингнинг меҳрига шамъи фалак парвонае.

Меҳнати Яъқуб эрур дардимдин, эй жон, шаммае,
Бўлди Юсуф киссаси даврингда бир афсонае.

Жону кўнглум бўлди вайрон ишқ ўти бирла, не ғам,
Чун манга бўлди бало кўйида меҳнатхонае.

Ошиқи бечораға чун васл умиди йўқтурур,
Эмдидин сўнгра фироқу гўшае вайронае.

Ёр, юрокимни чиқор, бу бевафо жонни равон,
Жони ман охир уйингда, не тилар бегонае.

Эй Хусайний, журъае васли майидин ичмойин,
Беҳуд ўлдунг, вой, гарким берсалар паймонае.

* * *

Мушкбў хаттинму дей ё лаъли дурборинму дей,
Кўзи имонинму дей ё зулфи зунноринму дей?

Кавсари лаълинму айтай, йўкса хаттидин анинг,
Теграсида сабзаи жаннат намудоринму дей?

Сабзаву гулдек хати бирла юзинму шарҳ этай,
Сабзаву гулдин безалган боғи рухсоринму дей?

Риштаи жон бирла ҳайвон суйидин сўрдинг хабар,
Белининг торинму айтай, лаъли гуфторинму дей?

Эйки, дерсен ишкида васф айла кўнглунг холини,
Хар тараф захминму дей ё нолаи зоринму дей?

Дахр боғи ўлларида гарчи йўк бўйи вафо,
Хар бирининг теграсида юз жафо хоринму дей?

Эй Хусайний, демагилким, ёр ишқин шарх этай,
Васлининг рашкинму дей, ҳажрининг озоринму дей?

* * *

Эй ажал, осуда кил хижрон балосидин мени,
Бир йўли қутқар улуснинг можаросидин мени.

Заъфим ошти ҳажр боғида сиришқу оҳдин,
Қутқар, эй васл, ул чаман обу ҳавосидин мени.

Эй ажал, кўркутма ўлтургум дебон, ўлтургасен,
Гар тирик топсанг фироқининг жафосидин мени.

Ишқу рашқу ҳажр мухлик, ваҳ, анга жоним фидо —
Ким, чиқарғай бу балоларнинг аросидин мени.

Хар неча ўтқарса ҳаддин муддаи бедоду зулм,
Ўтқара олмас висолинг муддаосидин мени.

Дерки, сабр этгил, ҳаками ақл, қилғил, соқие,
Бир қадах бирла халос онинг давосидин мени.

Эй Хусайний, салтанатдин онча фаҳрим йўктурур —
Ким, дегайлар кўйининг хайли гадосидин мени.

* * *

Бас эмас эрди манга ҳам ўз ўтум, ҳам ёр ўти —
Ким, анга афзун дағи бўлмиш яна бир зор ўти.

Ўз ўтум кўнглумга офат, ёр ўти жонға бало,
Боиси андуху дард ул бедили бемор ўти.

Бу бало барқи, ул офат дўзахи, кўр, турфақим,
Тез этар бу иккини бир хотири афгор ўти.

Буйла уч ўт бир кўнгулга тушса куймай найлагай,
Уйлаким, булбул ўтию гул ўтию хор ўти.

Жону кўнглум бирла бағрим куйди бу уч ўт била,
Яхши боқсам юз тамуғча ҳар бирининг бор ўти.

Ўз ўтум ё ёр ўтига гарчи таскин берса ашк,
Вах, ани найлайки, қилғай юз чақин изҳор ўти.

Гар Хусайнийга бир ўтлук юз ғами ўт солмаса,
Пас нечук оламни куйдурди Навоийвор ўти.

* * *

Қилмағай эрдим юзин кўрмак таманно кошки,
Солмағай эрдим кўнгул мулкига ғавғо кошки.

Васл аро тушти кўнгул мулкида ғавғо, эй рафик,
Қилғай эрди ҳажр ўти кўнглумни яғмо кошки.

Тенгри учун телба кўнглумни итургил, эй сипехр —
Ким, эмас ҳосил бу беҳосилдин илло кошки.

Ишқ аро расво бўлубмен, бу таассуфдин не суд,
Ё дарифедур ҳар ишнинг зимнида ё кошки.

Ул куёшнинг накди васли гарчи роҳатдур, вале,
Қилмағай эрди кўнгул они таманно кошки.

Менки ул ой ишқини қилдим таманно, эй кўнгул,
Қилғай эрдим зуҳд ичинда дийда бийно кошки.

Чун Хусайний давлати тавфик сандин истади,
Ушбу ишда солма кўнглига, худоё, кошки.

* * *

Эй ҳабибингдин келиб ҳамдингга ло ихсо сано,
Ул чу ожиз бўлса васфингким қила олғай яно.

Кому роҳатдур сенинг шавқингдағи андуҳу ғам,
Айшу ишратдур сенинг ишқингдағи дарду ано.

Ганж топса мунъим ўлмас кимни сен қилсанг фақир,
Ганж берса муфлис ўлмас кимга сен берсанг ғино.

Кўнглум эт маъмур меҳринг бирла, лекин қўймағил
Нафс анда қилғали хирсу ҳавас тарҳин бино.

Хаста кўнглумни ўзингдин ўзгадин бегона қил,
Ўзгадин бегона қилғач, қил ўзингга ошино.

Зулмати ҳижронинг ичра йўл озиб саргаштамен,
Ўз-ўзинг сори ҳидоят шамъи бирла эҳдино.

Лутф этиб ушшоқ аро, ёраб, наво қилғил насиб,
То Ҳусайнийнинг мақоми бўлса бу дори фано.

* * *

Уйлаким, гул ичра гунчанг ҳар неча маълум эмас,
Гунчаи оғзинг нечаким сўз деса мафҳум эмас.

Ул қуёшнинг партавин кўйида кўрсам йўқ ажаб,
Ҳеч ким жаннатда тўби нуридин маҳрум эмас.

Ишқ зулмидин агар Фарҳоду Мажнун ўлдилар,
Менда ҳар дамдур ўлум, мендек алар мазлум эмас.

Шох ҳукми бирла кўнглум ишқ таркин тутмағай,
Шох эрур ҳоким, вале бу кимсага маҳкум эмас.

Ишқу май журмиға дайр ичра мени ёзғурмангиз,
Негаким, масжидда дағи ҳеч ким маъсум эмас.

Не балодур ишқким, кўрдум анинг авроқида,
Дард ила меҳнатдин ўзга нуктае маркум эмас.

Гар Ҳусайнийнинг висолинг давлатидин, эй санам,
Яъси кўп мавжуд эса умиди ҳам маъдум эмас.

* * *

Заъфдин ўргамчи домиға йиқилғач чирманиб,
Ул чибиндек тўрлади ҳар ён танимни айланиб.

Лайливу Ширину Узро бордилар, ваҳ, не ажаб,
Бўлмоғим вола сангаким, сен қолибсен сайланиб.

Вомику Фарҳоду Мажнун ишқ ўтиға тўзмайин,
Бордилар, мен қолдим алардин ўтумға чурканиб.

Чурканиб қолғач ўтумға, маҳфий истаб ғайрдин,
Ўлтурубмен турфа иш, кўрким, кулумни бурканиб.

Ҳажрида жонимға бедод айласай айб этмангиз —
Ким, катик ҳол эрмиш айрилмоқ бировга ўрганиб.

Вах, не толедурки, ғам шоми тушимга кирса ёр,
Бовар этмай уйқудин сесриб қўпарман сесканиб.

Ёр кўйидин ўтарда бошима ёғса бало,
Анда айларман мавакқуф ҳар жихатдин куйманиб.

Ранжи хижрон заъфидин тебранмагим имкон эмас.
Онча кувват қайдаким, кўюнга борсам сурганиб.

Эй Хусайний, жуз фано оҳанги маълум ўлмади,
Кўйидаким навҳа қилдинг заъф вақти инграниб.

* * *

Қон кўруб ашқимни кўнглум ноласини сўрмангиз,
Чок ўлуб кўксум жигар парғоласини сўрмангиз.

Азм этиб ул ғунчаи хандон, адам гулзориға,
Юз бари очкон сирешким лоласини сўрмангиз.

Чунки борди ёшим эмди кўз оқидин катралар,
Томғанин ҳар ён кўруб ғам жоласини сўрмангиз.

Тийра кўнглумда юзин гардинда дардин кўрган эл,
Ғам тунида ою меҳнат ҳоласини сўрмангиз.

Ҳажрида кўрган Хусайнийнинг фиғонин, дўстлар,
Юсуф учун пири Канъон ноласини сўрмангиз.

* * *

Баъдазин, эй ҳусн аҳли, элни шайдо қилмангиз,
Бевафолик айлабон оламға расво қилмангиз.

Анланг, эй аҳли вафо, гар ўлсангиз тортиб жафо,
Бевафолардин вафо расми таманно қилмангиз.

Мен асири ишқмен, ғавғо недур ушшоқ аро,
Эй рафики пандгў, айтингки, «ғавғо қилмангиз!»

* * *

Мен ўлар ҳолатдамен, эй ёр кўйи итлари,
Айламанг ғавғо менинг сирримни ифшо қилмангиз.

Ўт тушубтур дашт уза оҳимдин, эй аҳли тараб,
Лолазор айлаб тасаввур азми сахро қилмангиз.

Сиррин элга ошкор айлар кишига ишқ аро
Зинҳор ўз сиррингизни ошкоро қилмангиз.

Бир нафас жонон била топмиш Ҳусайний хилвате,
Боринг, эй жону кўнгул, бир дам алоло қилмангиз.

* * *

Уйлаким, хуршед тоби заррани пайдо қилур,
Фунча оғзинг сиррини ҳам гул юзунг гўё қилур.

Зеб этар кўк сабзаси бирла қуёш рухсорини,
Котиби қудратки, хаттинг нусхасин иншо қилур.

Бор экин ошиққа меҳнат ўқларин ёғдурғали,
Улки мужгонинг қилиб новак, қошингни ё қилур.

Истади жону кўнгул накдини, ваҳ, суд айларам,
Гар лабидин бўсае ул накд ила савдо қилур.

Ҳажр зулмин кўрки, сабр айлай десам айлар ҳалок,
Айласам бесабрлик олам аро расво қилур.

Менинг аҳволим кўруб ибрат олинг, эй аҳли ишқ,
Кимки бир бадмеҳр ишқида ўзин шайдо қилур.

Эй Ҳусайний, чун ул ўтлук чехрадин олсам назар,
Қўзларимга дарди ҳижрон кочидин ўт чоқилур.

* * *

Қолғач оҳим сарсариға байт ул-аҳзоним менинг,
Ёғдурур гарду бало бошимға вайроним менинг.

Ишқ саҳроси аро ҳар сори қонлиғ лоладур,
Анда бағрим доғидин оқмиш магар қоним менинг.

Этғали кўнглум паришон менки қолдим билмайин,
Қай тараф борғанни Мажнуни паришоним менинг.

Буки лаълинг тиргизур элни такаллум айлабон.
Мен билурмен ушбу муҳлик ғамнию жоним менинг.

Новакин чекти кўнгулдин турфа, кўрким, ахтарур,
Чоклар айлабки қолмиш анда пайконим менинг.

Ошкоро ўтларимға чора қилсанг, эй табиб,
Они найларсенким, ўртар доғи пинҳоним менинг.

Эй Хусайний, нола қилсам ўлтурур кофир кўзи,
Гўйиё қўймас ани уйқуға афғоним менинг.

* * *

Эй кўнгул, ул бевафо кўйида маскан айлагил,
Зор йиғлаб шарҳ этиб ҳолимни шеван айлагил.

Неча бўлғаймен фироқингдин хароб, эй ганжи хусн,
Бир замон вайрона кулбамни музайян айлагил.

Сўрмағилким, гул очилганму экин бўстон аро,
Бурқаъ ол юзунгдину оламини гулшан айлагил.

Зулф зуннорини судраб, жилвасоз ўл, эй санам,
Юз туман обидни ҳар сори бараҳман айлагил.

Эй Хусайний, неча ёшурғайсен ул ой меҳрини,
Оқибат чун зоҳир эткунг эмди равшан айлагил.

* * *

Бу соз фанида қилди сеҳри комил,
Бу фанға сози бордур асру шомил.

Биз уш чўлдин келиббиз очиб, ориб,
Бизнингдек бўлмағай оламда сойил.

Кел эмди, сокийи гулчеҳра махваш,
Қўлунгни бўйнума қигил ҳамойил.

Бизинг парҳезимизни билди хўблар,
Анинг учун биза бўлмади мойил.

Ҳирининг хўблариға бўлди рамзе,
Хусайний сўзларидин бўлма ғофил.

МУНДАРИЖА

Хусайний. Суйима Фани кизи	3
«Ваҳки кўнглум ноласи...»	4
«Ўтга ёндур сарвини...»	4
«Бўлди гул вактию...»	5
«Не ажойиб хўй эрур...»	5
«Фуркатингдин йўк эди жисмимда жон...» «Телбараб...»	6
«Бир мусофир ой хаёли қилди...»	7
«Тўқуб қоним...», «Тоза бўлди...»	8
«Шукрлиллаҳким, жамолингдин...»	8
«Фурқатиндин...», «Ғунчаи хандон...»	9
«Ишқни манъ этсалар...»	10
«Кўз каросин ҳал қилиб...»	10
«Ул қуёш кўйида мен девонани...»	11
«Е раб, ул гул ичра ғунча нега...»	11
«Менда ҳар дам юз ниёзу...»	12
«Ишқ сиррин ошиқ ўлғон...»	12
«Тушғали ҳажрингда, эй сарви...»	13
«Зулф очиб мен телбани...»	13
«Ваҳ, не ишдур, кимниким...»	14
«Ҳажринг ўти жисму зорим қилди...»	14
«Чун жунун занжирига бўлдум...»	15
«Қани бир маҳваш анга...»	15
«Қилган эрмиш ул пари...»	16
«Мен ҳилол ўлдум ғамингдин...»	16
«Оташин хилъат дема...»	17
«Тиғ ила кўнглумни қилдинг...»	17
«Оҳ, агар кўрсам яна...»	18
«Гар келиб вайрона қабримни...»	18
«Зулфи ичра хат...»	19
«Ҳеч мусулмонга...»	19
«Кўнглум олур ғунчаи...»	19
«Хаттининг тори тушубтур...»	20
«Ҳажр шоми ой чиқиб...»	20
«Шоми ҳижронингни кўргач...»	21
«Нуктаи холинг ажаб...»	21
«Хатти жонафзо чиқармиш...»	22
«Эй кўнгул, гардун балият...»	22
«Ишқ аро Мажнунни дерменки...»	23
«Эй жафо тиғи келиб...»	23
«Эй санга мажнунсифат...»	24
«Мушкбў хаттинму дей...»	24
«Эй ажал, осуда қил ҳижрон балосидин...»	25
«Бас эмас эрди манга ҳам ўз ўтин...»	25
«Қилмағай эрдим юзин...»	26
«Эй ҳабибнингдин келиб...»	26
«Заъфдин ўргамчи домига...»	27
«Уйлаким, гул ичра ғунчанг...»	27
«Қон кўруб ашқимни кўнглум...»	28
«Баъдазин, эй ҳусн аҳли...»	28
«Уйлаким ҳуршед тоби...»	29
«Қолғач оҳим сарсариға...»	29
«Эй кўнгул, ул бевафо...» «Бу соз фанида қилди...»	30

Ғафур Ғулом номидаги нашриёт-матбаа бирлашмаси
Литературно-художественное издание

ХУСАЙН БАЙКАРА
РАДУЕТ ГЛАЗА ТВОЯ КРАСОТА

Газели

Художник Герасимова Т.

Тошкент, издательско-полиграфическое объединение
им. Г. Гуляма

На узбекском языке

Адабий-бадий нашр

ХУСАЙН БОЙКАРО
ЖАМОЛИНГДИН КЎЗУМ РАВШАН

Ғазаллар

Нашриёт муҳаррири *Усмон Қўчқор*

Расмлар муҳаррири *Немировский В.*

Техн. муҳаррир *Р. Раҳматуллина*

Мусаҳҳиҳ Ш. Собирова

ИБ 4970

Босмахонага 15.07.91 да берилди. Босишга 28.08.91 да рухсат этилди. Бичими 84×108¹/₃₂. Рўзнома қоғози. Адабий гарнитура. Юқори босма. 1,68 шартли босма тобоғи 1,89 бўёқ нусхаси. 1,3 нашр тобоғи. Жами 100 000 нусха. Буюртма 5854. Баҳоси 1 с. 50 т. 40—91 рақамли шартнома.

Ғафур Ғулом номидаги нашриёт-матбаа бирлашмаси. 700129. Тошкент, Навоий кў-
часи, 30.

Ўзбекистон Компартияси Марказий Комитети нашриётининг Меҳнат Кизил Байрок
орденли босмахонаси, ГСП Тошкент, «Правда» газетаси кўчаси, 41.